

MEP: Experto acustico a bari rapport di KEMA for di mesa

Rapport tocante proyecto di Urirama ta incompleto

ROBERT Rand, di Rand Acoustics, dialuna ultimo a duna dos charla riba invitacion di Residentenan Afecta di Urirama. Miembronan di MEP tabata presente na ambos presentacion, unda por cierto miembronan di AVP ni miembronan independiente Lopez Tromp y Wyatt Ras

a keda sin presenta. Sr. Rand a revisa henter e rapport di KEMA. E rapport di KEMA ta bisa cu e molinanan di biento lo no tin ningun efecto negativo riba ningun hende. Por cierto, e mesun rapport aki fraccion di AVP ta pone Gobierno di Aruba paga miles y miles di euro pa

laga revisa, siendo cu e rapport su base ta completamente fout. Pero desde un principio tabata tin hopi duda den e rapport di KEMA, pasobra ta e desaroyado mes a paga pa e rapport aki, y tur hende sa cu “wie betaalt bepaalt”, y den e caso aki e desaroyado sigur lo no a permiti

KEMA menciona nada negativo di e proyecto. Y awor un experto den zonido a desbarata e rapport. Sr. Rand a elabora riba solamente 7 punto for di cual e ta conclui cu e rapport no ta bon. E ta sigur cu tin hopi mas punto, pero pa awor el a limita su mes na 7 punto di cual e ta di



opinion cu KEMA a ekiboca su mes. Nan ta puntonan bastante tecnico, cu ta relata na e forma cu a midi e zonidonan caminda no a elimina e efecto di biento. Tambe por ehempel e criterio di 41dBA, cual ta pa zonido di trafico, mientras cu esun di molina di biento no por wordo compara cu trafico, pasobra e zonido di molina di biento ta causa hopi mas molester. Den reunion cu Gabinete di Ministernan, a keda palabra cu Sr. Rand lo manda su puntonan por escrito pa asina Gobierno manda esakinan pa KEMA por reacciona riba nan. Ta increibel cu un compania manera KEMA por ekiboca su mes, no un biaha, sino por lo menos 7 biaha.

Profesional caution

Sr. Rand a manda un aviso pa Gobierno di Aruba, un asina yama ‘professional caution’ den cual e ta bisa Gobierno cu e ta tuma mucho riesgo di pone e molinanan asina cerca di un area hopi habita pa hende. E molinanan ta mucho cerca di 910 cas, afectando asina 2700 persona directamente. Ta di mira kico gobierno lo haci cu e informacion aki, pasobra MEP tambe a haci investigacion y e reputacion di Rand Acoustics ta hopi bon mundialmente y ta wordo considera expertonan den e area aki. Awor cu Gobierno tin den su poder por escrito un opinion di un experto acustico, dificilmente por kere e rapport di KEMA y di Vader Piet cu ta bisa cu e molinanan NO tin efecto negativo riba salud di hende.